



JUDICIAL SYSTEM MONITORING PROGRAMME  
PROGRAMA MONITORIZASAUN SISTEMA JUDISIÁRIU

***Komunikadu Imprensa***  
***Tribunál Distritál Dili***  
**06 Janeiro 2015**

**Tribunál Distritál Dili kondena arguidu ba kazu violasun seksuál agravadu ho pena prizaun tinan 17**

Iha 30 Dezembru 2015, Tribunál Distritál Dili prezide prosesu rejulgamentu ba kazu violasaun seksuál agravadu no kondena arguidu AdC ho pena prizaun tinan 17. Sentensa ne'e menus hosi pena tinan 20 ne'ebé antes ne'e iha 18 Maiu 2015, tribunál kondena iha julgamentu primeiru. Tribunál konklui katak arguidu provadu komete krime violasaun seksuál agravadu hasoru nia kuñada ne'ebé sei ho idade tinan 15. Kazu ne'e akontese iha Dezembru 2011, iha Distritu Likisá.

“JSMP apresia katak tribunál mantein kondena arguidu ho pena ne'ebé besik pena másimu tinan 20 ba krime violasaun seksuál agravadu ne'ebé involve membru família uma laran,” dehan Diretór interinu JSMP, Casimiro dos Santos.

JSMP fiar katak kondensasaun ne'ebé aas ba kazu sira ne'ebé involve violénsia seksuál, bele fó lisaun ba ema seluk, liu-liu ema ne'ebé iha relasaun besik ka família atu hadok-an hosi krime ho natureza violénsia seksuál. Kondensasaun ne'e mós hatudu katak violasaun seksuál nu'udar krime ne'ebé grave tuir enkuadramentu legál Timor-Leste nian.

Ministériu Públiku akuza arguidu kontra artigu 172 Kódigu Penál kona-ba violasaun seksuál no 173 (a) no (b) Kódigu Penál kona-ba agravasaun tanba dependénsia ekonómika ka laboral no involve vítima ho tinan ki'ik liu 17.

Tribunál prova katak iha Dezembru 2011, arguidu se katana ba lezada nia kakorok, dada lezada ba iha kuartu laran no riba lezada ba kama leten no komete violasaun seksuál hasoru lezada. Hafoin ida ne'e, iha tempu ne'ebé la apuradu arguidu dada lezada ba kuartu laran no latan latan lezada ba kama leten no komete tan violasaun

seksuál hosoru lezada. Arguidu komete krime ne'e wainhira arguidu nia feen ho nia oan sira ba vizita sira nia família.

Iha loron seluk ne'ebé mós la-apuradu, arguidu repete ninia hahalok hasoru lezada wainhira arguidu nia feen ba partisipa halo lia. Arguidu kontinua viola lezada dala 3 tan, wainhira lezada ba taa au, kuu modo no ba hamos to'os. Durante ne'e lezada hela ho arguidu. Konsekuensia hosi arguidu ninia hahalok rezulta lezada isin-rua no partu bebe iha 2013.

Faktus provadu hirak ne'e prodús bazeia ba konfisaun arguidu nian katak oan ne'ebé lezada hahoris ne'e nu'udar nia oan. Maibé arguidu deklara katak nia halo relasaun seksuál ho lezada dala 1 de'it. Aleinde deklarasaun hosi arguidu, tribunál mós prova faktus bazeia ba lezada nia deklarasaun katak lezada komete krime hasoru nia dala 6.

Kazu ne'e halo fali rejulgamentu tanba tribunál rekursu anula desizaun tribunál primeira instánsia tanba konsidera katak faktus ne'ebé Tribunál Distritál Dili nu'udar tribunál primeira instánsia konklui katak arguidu provadu komete violasaun seksuál dala 7 hasoru lezada maibé la deskreve detallu maneira no oinsá arguidu komete krime refere.

Iha rejulgamentu ne'e, tribunál rona fila fali lezada nia deklarasaun no lezada deklara katak arguidu halo duni relasaun seksuál ho lezada hamutuk dala 6, la'os dala 7. Arguidu komete dala 3 iha uma no dala 3 iha to'os. Iha rejulgamentu ne'e, depois-de hetan esplikasaun hosi tribunál, lezada foin ko'alia no deklara faktus ho detallu, la hanesan ho julgamentu primeiru.

JSMP hanoin katak tuir loloos iha kualker kazu, tribunál iha obligasaun atu asegura vítima la sente tauk atu ko'alia sai sira nia kazu ba tribunál, satan ba kazu violasaun seksuál ne'ebé dalabarak vítima sira mak sai nu'udar testemuña prinsipál ba sira nia kazu.

JSMP hanoin mós katak, ida ne'e kabe mós ba kompênsia ministériu públiku nian atu tenke apresenta faktus ne'ebé forte ba iha tribunál no enkoraza vítima ba iha kazu violasaun seksuál atu ko'alia sai nia kazu ba iha tribunál.

Bazeia ba faktus provadu sira ne'ebé prodús durante julgamentu, tribunál konklui prosesu ne'e no kondena arguidu ho pena prizaun tinan 17.

Juis ne'ebé prezide kazu ne'e kompostu hosi Dra. Julmira Auxiliadora, Dra. Ana Paula Fonseca, Dra. Sribuana da Costa. Entretantu ministériu públiku representa hosi Dr. Reinato Bere Nahak no arguidu hetan defeza hosi Dr. Manuel Exposto.

Atu hetan informasaun klean, favor kontaktu:

Diretór interinu JSMP

Casimiro dos Santos

Diresaun e-mail: [santos.cas76@gmail.com](mailto:santos.cas76@gmail.com)

[info@jsmp.minihub.org](mailto:info@jsmp.minihub.org)

Telefone: 3323883 | 77257466

Rua setubal, Colmera, Dili Timor Leste

PoBox: 275

Telefone: 3323883 | 77295795

[www.jsmp.tl](http://www.jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPTl